

續脩南鄭縣志

第五卷

風土

水土

禮俗

物產

古蹟



續修南鄭縣志卷五

風土

水土

水爲輕氣養氣化合之液體其鹹淡甘澇皆緣土質所混合故辨水必先於辨土周禮大司徒辨十有二壤之物而知其種以教稼穡樹藝草人掌土化之灋以物地相其宜而爲之種與今之農學化學植物學皆冥符遙契校其優劣察其利病以供農林業之考驗焉

邑南北皆山中貫漢水其土質各自不同北山連終南勢陡峻率多石面帶土瘠薄少可耕地谿谷深狹雖鑿田種稻然氣候

高寒收數視南山爲絀又山木十年之產不如南山五年之株
近山一帶地勢傾斜土壤色赤性緊而黏周禮所謂駢剛彊礫
乃其類也旱則固結物根難行霖則貯水空氣不通是以農力
有加而收量常歉

南則廟壩龍頭山花石梁一帶山高氣寒半成老林餘則依次
而北岡陵成阜山谷開展其質土中含沙疏潤而脆田雖溝而
坦平山有木而易生近山一帶隨地皆田號稱沃壤故邑之柴
薪竹木莫不仰給焉

中則川流交錯成南北土壤混合之質北部純土爲田久沃以
水而失固結之態南則堰田雖帶沙質疏鬆易肥收量更豐惟

漢水沿岸冲積無常冲則土去不啻石田積則加淤轉覺肥美
又以石驗之北山之石理皆層結泐之易缺久經雨露多順理
而圻其質剛也南帶之石如自中梁產者其石理不類北山之
顯露泐之無不如意年久不拆其質剛中寓柔也石自地出卽
此可驗南北之土性矣

水則出自兩山由上趨下或溜諸石或浸乎沙故皆清冽甘淡
絕無鹹瀋隨地可飲惟北山之水其勢勁一遇甚雨冲石曳木
洶湧而來故襄水入漢處漢水中流似不敵稍遜而南因有讓
水之稱又北山幽谷所停之水土人飲之多起癭南山則否緣
南山坡低田廣木葉率作肥料北山林荒田稀木葉逐年層積

蓄水多雜質故也

北部之山與秦連故其土亦近秦而人民之簡樸似之南部之山與蜀接故其土亦類蜀而人民之習尚似之地質之關係如此

禮俗

漢廣嘉游女免置美野人其來尚矣世風遞降習俗遂日趨於澆況南鄭遭藍髮之亂土著僅十之二三餘多客籍家自爲俗然士食舊德農服先疇其禮節之大者固自不殊惟五方雜處良莠不齊俗尚之美弊乃由是分因其美以革其弊反樸歸醇或庶幾焉

府志府屬風俗不甚懸殊於卦值坤故多斑絲於辰值未故尚滋味德在少昊故尚辛香星應井鬼故君子精敏小人鬼黠勇悍

漢書地理志漢中楚分也火耕水耨民食魚稻以漁獵伐山爲

業果麻贏蛤食物常足故皆窳媮生而無積聚飲食粗給不憂凍餓亦無千金之家信巫鬼重祭祀與巴蜀俗同

河圖括地象梁州其音商徵其泉苦以辛其氣剛勇其人聲塞華陽國志漢中其民質直好義士風樸厚有先民之遺

隋書地理志漢中之人質樸無文不甚趨利性嗜口腹多事漁田雖蓬室柴門食必兼肉好祀鬼神尤多忌諱崇重道教猶有張魯之風

宋史地理志梁州地狹而腴民勤耕作歲收所獲多爲遨遊之費踏青藥市之集尤盛焉動至連月好音樂少愁苦尙奢靡性輕揚喜虛稱庠塾聚學者眾然懷土罕趨仕進

太平寰宇記俗多醇謹不尚浮華

王志南鄭爲天漢名區文物衣冠甲於一郡惟是地處萬山之中陸阻雲棧水阨黃金跋涉維艱商販罕至穀貴餓農穀賤傷農二者皆所不免兼之深山窮谷墾荒辟土者多異地之人睚眦啟釁訟獄滋多此則閭郡皆然而南鄭以附郭近邑猶爲此善於彼

南鄭西北鄉人多儉樸男耕女織頗有古風東鄉十八里舖爲邑巨鎮商賈輻輳半皆客民人情好尚各異南山一帶多川楚遺族田產沃饒俗尚侈靡會匪潛蹤化導非易嚴氏樂園之所謂棚民也

冠禮久廢搢紳子弟有十五歲方戴禮冠者多於元旦拜賓爲始頗爲近似

昏禮六禮僅存其四以問年代問名以合婚代納吉而禮缺焉議婚諧先行聘名曰下定有似納徵幣帛以四兩爲率近則日趨於奢成婚前數日有結婚禮以豕一羊一爲贄單夾皮棉紗衣服五套輔以鹽茶果餅之屬他物均可隨意惟鹽茶必不可缺請期行禮者少多以禮物同期單送去迎婦多請女賓代迎士族間有親迎者雁不可得以鵝代之反馬禮三五日內擇吉行之

古者三十而娶二十而嫁南鄭近多早婚旣乖古禮又妨體育

喪禮殮以三日忌用金玉士族請賓贊禮較清時會典禮稍繁
葬禮視清會典更繁題主舊俗必延一有爵德者設公案用硃
筆點主穿神近有純用墨筆書者

大小祥行禮者均三獻惟禫祭多不舉行除服以三十六月爲
期士族雖遵禮起復而釋服必過三週

時薦忌日多祭於寢禮儀疏濶墓祭以清明新葬之墳必於驚
蟄前拜掃名曰拜新墳餘則七月望十月朔或焚香楮於墓或
化冥錢於門其爲秋霜之感一也

慶賀有用物品者有折錢者折錢以千爲率多則一千以上少
亦三五百文鄉間對於至戚有以米麥酒脯相饋者謂之助禮

行禮以三揖致敬士族有再拜者

人家族姓多者必建宗祠每於冬至日祭祖名曰拜冬禮亦三獻視葬事爲儉

凡慶與弔主者必設筵待之席終所餘主人必備紙及荷葉以供賓之取攜焉其始由於明瑞王建藩南鄭時常宴鄉老於邸人賜布一方以裹餘脯民間因呼之曰宴瑞帕榮王賜也後遂易以紙而仍其名小人有母穎考叔之遺風徧行於漢南矣
令節以新年爲最四民各休其業陰曆除夕家家守歲燃爆竹焚香拜神祀祖元旦家人依次行禮謂之賀歲連日族黨朋戚彼此往來五日掃除門庭塵積炮滓棄之通衢亦韓退之送五

窮故事也十五日張燈結綵歌管酒筵歡聲達旦龍燈蓮船竹馬獅子無村不有四月八日各寺設齋壇作浴佛會家家書毛蟲帖子以嫁毛蟲二十八日城隍神誕期遠近人民集會相慶商賈藉以售貨焉五月五日端陽節懸艾掛蒲飲雄黃酒食角黍兼相饋遺漢水上設龍舟競渡咸往觀之六月六日曝書曬衣七月七日昔年村塾學生皆禮拜奎斗是夕幼女亦設瓜果供神乞巧擲芽水碗中視影變幻以卜巧拙迨學校設立此風漸息八月十五中秋節饋送月餅瓜果夜則陳果餅對月焚香宴飲玩賞十二月初八日各寺舉佛會家家清晨煮臘八粥東坡所謂今朝佛粥更相饋其俗久矣二十三日祀竈祭以餅飴

雄雞婦女尤虔以竈神將更代報一家善惡於上蒼也事雖無稽亦足以警愚除日貼春聯門神置酒肴少長咸集行禮辭歲然後飲酒食肉謂之團年

婦人於朔望多持齋一日或二三日鰥寡孤獨持之尤甚自誓曰修來世以故禮佛朝山鄉中婦人之老者最夥間有男子亦以持齋誦經爲名非道非釋誑惑鄉愚而斂貲財者

鄉間有糾紛每邀團約紳衿赴茶肆或社廟理論曲者每爲直者掛紅布燃爆竹以息爭亦古人負荆之意或有賄袒徇徇始赴法庭起訴團約苟得人亦息事安民之一法

郡城內昔有菜館一時設時閉今則不下數十處昔本地巨富

非有慶賀宴會罕衣裘緞今則裘緞諸物價昂數倍而服者愈眾習尙日靡卽此可見

南山賭風由於哥老游民無職業者率以爲生活一經官吏嚴禁卽可少息近則麻雀之風盛行由城鎮漸及於村鄉矣

愚民有病初不延醫而延巫俗云端工卽古所稱擔弓者也喧闐一夜祈禱無效始進而謀諸醫甚有無病亦招擔弓名曰慶太平壇謂可保家中清吉或三年一慶或一年一慶此風類出於山間無識流氓亦可喙也

貧家生女不能自育在土著每於數歲預訪夫家而歸之名曰童養在客民養至四五歲則售於人作婢旣爲女尋一生路又

畧得資財以故效尤者眾遂爲遠方宦商買婢者所注意亦以見邑中流寓之眾也

三省邊防備覽山中五方雜處無族姓之聯綴無禮教之防維呼朋招類動稱盟兄姻婭之外別有乾親故每多奸拐之事人理旣滅事變所以頻仍也

物產

古者以土宜之法辨其名物以任土事故禹貢不遺草木用
能六府孔修庶土交正後世虞衡之職不修山澤之利任人
自營史家述事亦祇考貢品異物他多佚焉豈知物隨地產
非以厚生卽以利用未可以尋常略也茲將縣境所有天然
物產分植動礦三部視各產量之多寡依次表列以便類稽

植物部產物表

類	別名	稱生	產	情	形
---	----	----	---	---	---

禾穀類

稻

除南北深山及北境高原不能引水灌溉 外餘皆產之產量沃田每畝約二石至二

石五斗尤以縣南上下廉水壩上下紅花
河產者爲佳

麥

全境均產之縣東北尤多產量腴地每畝
約五斗至八斗

玉蜀黍

俗呼
包穀

全境均產之深山內較多產量山地每畝
約三斗至五斗

粟

俗呼
小米

平地產之不爲農家所重故產量較少

黍

與粟略
同性黏

全境均產之惟農家間種以爲煮粥之用

北方通呼
曰黃米子

故產量亦少

稷

卽高粱
北方通

平地產較多每畝產量約一石五斗至二